

四庫全書

史部

欽定四庫全書

史部

明史卷一百七十四

御史臣李陽樾覆勘

總校官編修臣朱鈴

欽定四庫全書

明史卷一百七十三

大學士張廷玉等奉敕修

列傳第六十一

楊

洪

從子

龍

從子

權

從子

權

從子

石

從子

亨

從子

彪

從子

後

郭

登

從子

龍

從子

權

從子

權

從子

朱

從子

謙

從子

永

從子

暉

等

孫

鏗

從子

龍

從子

權

從子

權

從子

范

從子

廣

從子

暉

等

楊洪字宗道六合人祖政明初以功為漢中百戶父璟

戰死靈壁洪嗣職調開平善騎射遇敵輒身先突陣初從成祖北征至鄂諾河獲人馬而還帝曰將才也令識其名進十戶宣德四年命以精騎二百專巡撒塞上繼命城西猫兒峪留兵戍之敗寇於紅山英宗立尚書王驥言邊軍怯弱由訓練無人因言洪能詔加洪遊擊將軍洪所部才五百詔選開平獨石騎兵益之再進都指揮僉事時先朝宿將已盡洪後起以敢戰著名為人機變敏捷善出奇搗虛未嘗小挫雖為偏校中朝大臣皆

知其能有毀之者輒為曲護洪以是得展其才尚書魏源督邊事指揮杜衡部卒李全皆訐奏洪罪帝從源言謫衡廣西執全付洪自治尋命洪副都督僉事李謙守赤城獨石謙老而怯故與洪左洪每調兵謙輒陰阻之洪嘗勵將士殺敵謙笑曰敵可盡乎徒殺吾人耳御史張鵬劾罷謙因命洪代洪益自奮朝廷亦厚待之每奏捷功雖微必叙洪初敗烏梁海兵執其部長多羅特穆爾既代謙任復敗其兵於西涼亭帝賜敕嘉獎又敕宣

大總兵官譚廣等曰此即前寇延綏為指揮王禎所敗者去若軍甚邇顧不能撲滅若視洪等媿不三年春擊寇於巴延山洪馬蹶傷足戰益力擒其部長雅台等四人追至寶昌州又擒阿台達爾罕等五人寇大敗遁去璽書慰勞遣醫視進都指揮同知賜銀幣尋以譚廣老命充右叅將佐之洪建議加築開平城拓龍門所自獨石至潮河川增置墩臺六十尋進都指揮使與烏梁海兵戰三岔口又寇至伊爾巴圖河再遷都督同知

九年烏梁海寇延綏洪與內臣韓政等出大同至黑山  
迤北邀破之克爾寇進左都督軍士蒙賞者九千九百  
餘人洪嘗請給旗牌不許乃自製小羽箭木牌令軍中  
有司論其專擅帝不問十二年充總兵官代郭珰鎮宣  
府自宣德以來迤北未嘗大舉入寇惟朵顏三衛衆乘  
間擾邊多不過百騎或數十騎他將率巽懦洪獨以敢  
戰至大將諸部亦憚之稱為楊王衛拉持汗托克托布  
哈太師額森皆嘗致書於洪並遺之馬洪聞於朝敕受

之而報以禮嗣後數有曾遺帝方倚任洪不責也帝既北狩道宣府額森傳帝命趣開門城上人對曰所守者主上城池天已暮門不敢開且洪已他往額森乃擁帝去景帝監國論前後功封昌平伯額森復令帝為書遺洪洪封上之時景帝已即位馳使報洪上皇書偽也自今雖真書毋受於是洪一意堅守額森逼京師急詔洪將兵二萬入衛比至寇已退敕洪與孫鏜范廣等追擊餘寇至霸州破之獲阿輝等四十八人還所掠人畜萬



計及闕寇返闕殺官軍數百人洪子俊幾為所及寇去以功進侯命率所部留京師督京營訓練兼掌左府事朝廷以洪宿將所言多采納嘗陳禦寇三策又奏請簡汰三千諸營將校不得以貧弱充伍皆從之景泰元年于謙以邊警未息宜令洪等條上方畧洪言四事命兵部議行都督官聚王喜張斌先坐罪繫獄洪與石亨薦三人習戰請釋令立功詔已許而言官劾其黨邪撓政帝以國家多事務得人置不問上皇還洪與石亨俱授

奉天翊衛宣力武臣予世恭明年夏佩鎮朔大將軍印  
還鎮宣府從子能信充左右叅將其子俊為右都督管  
三千營洪自以一門父子官極品手握重兵盛滿難居  
乞休致請調俊等他鎮帝不許八月以疾召還京踰月  
卒贈潁國公謚武襄妾葛氏自經以殉詔贈淑人洪久  
居宣府御兵嚴肅士馬精強為一時邊將冠然未嘗專  
殺又頗好文學嘗請建學宣府教諸將子弟子傑嗣上  
言臣家一侯三都督蒼頭得官者十六人大懼不足報

稱乞停蒼頭楊釗等職詔許之仍令給俸傑卒無子庶兄俊嗣俊初以舍人從軍正統中累官署都指揮僉事總督獨石永寧諸處邊務景帝即位給事中金達奉使獨石劾俊貪侈乃召還額森犯京師俊敗其別部於居庸進都督僉事尋充右叅將佐朱謙鎮宣撫太監喜寧數誘敵入寇中朝患之購擒斬寧者賞黃金千兩白金二萬兩爵封侯寧為都指揮江福所獲而俊冒其功廷臣請如詔帝以俊邊將卒所當為不允加右都督賜金

幣俊恃父勢恣橫嘗以私憾杖都指揮陶忠至死洪懼  
奏俊輕躁恐悞邊事乞令來京隨臣操練許之既至言  
官交劾下獄論斬詔令隨洪立功未幾冒擒喜寧功事  
覺詔追奪冒陞官軍別賞福等而降俊官令勦賊自劾  
俄充遊擊將軍巡徼真保涿易諸城還督三千營訓練  
景泰三年俊上疏曰額森既弒其主併其衆已藏禍心  
窺伺邊境直須時動耳聞其妻孥輜重去宣府纔數百  
里我緣邊宿兵不下數十萬宜分為奇正以待誘使來

改正兵列營大同宣府堅壁觀變而出奇兵倍道搗其巢彼必還自救我軍夾攻可得志疏下廷議于謙等以計非萬全遂寢團營初設命俊分督四營明年復充遊擊將軍送衛拉特使歸至永寧被酒杖都指揮姚貴八十且欲斬之諸將力解而止貴訴於朝宣府叅政葉盛亦論俊罪以俊嘗潰於獨石斥為敗軍之將俊上疏自理封還所賜敕書以明已功言官劾其跋扈論斬錮之獄會傑卒傑母魏氏請暫釋俊營傑葬事乃宥死降都

督僉事旋襲洪職家人告俊盜軍儲再論死輸贖還爵  
久之又以陰事告俊免死奪爵命其子珍襲俊初守永  
寧懷來聞顧森欲奉上皇還密戒將士毋輕納既還又  
言是將為禍本及上皇復位張軌與俊不協言於朝廷  
徵下詔獄坐誅奪珍爵戍廣西憲宗立授龍虎衛指揮  
使能字文敬沈毅善騎射從洪屢立功為開平衛指揮  
使進都指揮僉事景泰元年進同知充遊擊將軍沿邊  
巡徼寇犯蔚州畏不進復與紀廣禦寇野狐嶺敗傷右

滕為御史張昊所劾宥之尋命與石彪各統精兵三千  
訓練備調遣再加都督僉事累進左副總兵協守宣府  
巡撫李秉劾其貪惰弗問五年召還總神機營天順初  
以左都督為宣府總兵官與石彪破寇磨兒山封武強  
伯額森已死保喇繼興能欲約烏梁海共襲劫之與以  
信礮兵部劾其非計帝以能志在滅賊置不罪寇犯宣  
府能失利復為兵部所劾帝亦宥之是年卒無子弟倫  
襲羽林指揮使信字文實幼從洪擊敵興州賊將方躍

馬出陣前信直前擒之以是知名累功至指揮僉事正  
統末進都指揮僉事守柴溝堡額森犯京師入衛進都  
指揮同知景泰改元守懷來寇入不能禦護餉永寧間  
礮聲奔還皆被劾朝議以方用兵不問累進都督僉事  
代能為左副總兵協鎮宣府上言鹿角之制臨陣可捍  
敵馬結營可衛士卒每隊宜置十具遇敵團牌拒前鹿  
角列後神銃弓矢相繼迭發則守無不固戰無不克從  
之天順初移鎮延綏進都督同知明年破寇青陽溝大



獲封彰武伯佩副將軍印充總兵官鎮守如故延綏設  
總兵官佩印自信始也頃之破寇高家堡三年與石彪  
大破寇於野馬澗明年寇二萬騎入榆林信擊却之追  
奔至金雞峪斬平章烏遜特穆爾還所掠人畜萬計其  
冬代李文鎮大同憲宗即位信自陳前後戰功予世券  
成化元年冬禦寇延綏無功召還督三千營瑪拉噶據  
河套命佩將軍印總諸鎮兵往禦寇既渡河北去已復  
還據套分掠水泉營及朔州信等屢却之寇遂東入大

同因詔信還鎮大同六年信與副將徐恕叅將張瑛分  
道出塞敗寇於胡柴溝獲馬五百餘匹璽書獎勵信在  
邊三十年鎮以安靜人樂為用然性好營利代王嘗奏  
其違法事詔停一歲祿十三年冬卒於鎮贈侯謚武毅  
洪父子兄弟皆佩將印一門三侯伯其時稱名將者推  
楊氏昌平侯既廢能以流爵弗世而信獨傳其子瑾弘  
治初領將軍宿衛三傳至曾孫炳隆慶時協守南京召  
掌京營戎政屢加少師卒謚恭襄傳子至孫崇猷李自

成陷京師被殺

石亨渭南人生有異狀方面偉軀美髯及膝其從子彪魁梧似之鬚亦過腹就飲酒肆相者曰今平世二人何乃有封侯相亨嗣世父職為寬河衛指揮僉事善騎射能用大刀每戰輒摧破正統初以獲首功累遷都指揮僉事敗敵黃牛坡獲馬甚衆三年正月敵三百餘騎飲馬黃河亨追擊至官山下多所斬獲進都指揮同知尋充左叅將佐武進伯朱冕守大同六年上言邊餉難繼

請分大同左右玉林雲川四衛軍墾淨水坪迤西墾土  
官給牛種可歲增糧萬八千石明年又言大同西路屯  
堡皆臨極邊玉林故城去右衛五十里與東勝單于城  
接水草便利請分軍築壘防護屯種詔皆允行尋以敗  
敵紅城功進都指揮使敵犯延安追至金山敗之再遷  
都督僉事亨以國制搜將才未廣請倣漢唐制設軍謀  
宏遠智識絕倫等科令人得自陳試驗擢用不專保舉  
報可十四年興都督僉事馬麟巡徼塞外至箭谿山敗

烏梁海衆進都督同知是時邊將智勇者推楊洪其次則亨亨雖偏將中朝倚之如大帥故亨亦盡力其秋額森大舉寇大同亨及西寧侯宋瑛武進伯朱冕等戰陽和口瑛冕戰沒亨單騎奔還降官募兵自効邸王監國尚書于縑薦之召掌五軍大營進右都督無何封武清伯額森逼京師命偕都督陶瑾等九將分兵營九門外德勝門當敵衝特以命亨于謙以尚書督軍寇薄彰儀門都督高禮等却之轉至德勝門外亨用謙令伏兵誘

擊死者甚衆既而圍孫鏜西直門外以亨救引邵相持五日寇斂衆遁論功亨為多進侯景泰元年二月命佩鎮朔大將軍印帥京軍三萬人巡哨大同遇寇敗之其秋予世襲誥券易儲加亨太子太師于謙立團營命亨提督總兵官如故八年帝將郊宿齋宮疾作不能親行禮召亨代亨受命榻前見帝病甚遂與張軓曹吉祥等謀迎立上皇上皇既復辟以亨首功進爵忠國公眷顧特異言無不從其弟姪家人冒功錦衣者五十餘人部

曲親故竄名奪門籍得官者四千餘人兩京大臣斥逐殆盡納私人重賄引用太僕丞孫弘郎中陳汝言蕭璵張用瀚郝璜龍文朱銓員外郎劉本道為侍郎時有語曰朱三千龍八百勢焰熏灼嗜進者競走其門既以私憾殺于謙范廣等又以給事中成章御史甘澤等九人嘗攻其失貶黜之數興大獄搆陷耿九疇岳正而戌楊瑄張鵬謫周斌盛顯等又惡文臣為巡撫抑武臣不得肆盡撤還由是大權悉歸亨亨無日不進見數預政事

所請或不從輒然見於辭色即不召必假事以入出則張大其勢市權利久之帝不能堪嘗以語閣臣李賢賢曰惟獨斷乃可帝然之一日語賢曰閣臣有事須燕見彼武臣何故頻見遂敕左順門非宣召毋得納總兵官亨自此稀燕見亨嘗白帝立碑於其祖墓工部希亨指請敕有司建立翰林院撰文帝以永樂以來無為功臣祖宗立碑故事責部臣而今亨自立初帝命所司為亨營第既成壯麗踰制帝登翔鳳樓見之問誰所居恭順



侯吳瑾謬對曰此必王府帝曰非也瑾曰非王府誰敢  
僭踰若此帝顧之亨既權侂人主而從子彪亦封定遠  
侯驕橫如亨兩家蓄材官猛士數萬中外將帥半出其  
門都人側目三年秋彪謀鎮大同令千戶楊斌等奏保  
帝覺其詐收斌等拷問得實震怒下彪詔獄亨懼請罪  
帝慰諭之亨請盡削其姪官放歸田里帝亦不許及鞫  
彪得繡蟒龍衣及違式寢床諸不法事罪當死遂籍彪  
家命亨養病亨嘗遣京衛指揮裴瑄出關市木遣大同

指揮盧昭追捕亡者至是事覺法司請罪亨帝猶置不問法司再鞠彪言彪初為大同遊擊以代王增祿為已功王至跪謝自是數款彪出歌妓行酒彪凌侮親王罪亦當死因劾亨招權納賕肆行無忌與術士鄒叔昇等私講天文妄談休咎宜置重典帝命錮彪於獄亨閒住罷朝叅時方議革奪門功窮治亨黨由亨得官者悉黜朝署一清明年五月錦衣指揮達果奏亨怨望與其從孫後等造妖言蓄養無賴專伺朝廷動靜不軌迹已著

廷臣皆言不可輕宥乃下亨詔獄坐謀叛律斬沒其家  
貲踰月亨瘐死彪後竝伏誅彪驍勇敢戰善用斧初以  
舍人從軍正統末積功至指揮同知額森逼京師既退  
追襲餘寇頗有斬獲進署都指揮僉事景泰改元詔予  
實授克遊擊將軍守備威遠衛敵圍土城彪用礮擊死  
百餘人遁去塞上日用兵彪勇冠流輩每戰必捷以故  
一歲中數遷至都督僉事恃亨勢多縱家人占民產又  
招納流亡五十餘戶擅越關置莊墾田為給事中李侃

御史張奎所劾請竝罪亨景帝皆宥不問但令給還民產遣流亡戶復業而已三年冬充右參將協守大同嘗憾巡撫年富抑已不得逞及英宗復辟召彪還亨方得志彪遂誣奏富罪致之獄未幾進都督同知再以遊擊將軍赴大同備敵與叅將張鵬等哨磨兒山寇千餘騎來襲彪率壯士衝擊斬巴圖王寨其旗俘斬百二十人追至三山墩又斬七十二人以是封定遠伯遊擊如故天順二年命偕高陽伯李文赴延綏禦寇以疾召還尋

充總兵官明年正月保喇二萬騎入掠安邊營彪與  
彰武伯楊信等禦之連戰皆捷追奔出塞轉戰六十餘  
里生擒四十餘人斬首五百餘級獲馬駝牛羊共二萬餘  
為西北戰功第一捷聞進侯彪本以戰功起家不藉父  
兄廕然一門二公侯勢盛而驕多行不義謀鎮大同與  
亨表裏握兵柄為帝所疑遂及於禍後天順元年進士  
助亨籌畫都督杜清出亨門下後造妖言有土木掌兵  
權語益言杜也事覺後伏誅清亦流金齒

郭登字元登武定侯英孫也幼英敏及長博聞強記善  
議論好談兵洪熙時授勲衛正統中從王驥征麓川有  
功擢錦衣衛指揮僉事又從沐斌征騰衝遷署都指揮  
僉事十四年車駕北征扈從至大同超拜都督僉事充  
叅將佐總兵官廣寧伯劉安鎮守朱允等軍覆倉猝議  
旋師登告學士曹鼐張益曰車駕宜入紫荆關王振不  
從遂及於敗當是時大同軍士多戰死城門晝閉人心  
洶洶登慷慨奮勵修城堞繕兵械拊循士卒死問傷

親為裏創傳藥曰吾誓與此城共存亡不令諸君獨死也八月額森擁帝北去經大同使袁彬入城索金幣登閉城門以飛橋取彬入登與安及侍郎沈固給事中孫祥知府霍瑄等出謁伏地慟哭以金二萬餘及宋瑛朱冕內臣郭敬家資進地以賜額森等是夕敵營城西登謀遣壯士劫營迎駕不果明日額森擁帝去景帝監國進都督同知充副總兵尋令代安為總兵官十月額森犯京師登將率所部入援先馳蠟書奏奏至敵已退景

帝優詔褒答進右都督登計京兵新集不可輕用上用  
兵方畧十餘事景泰元年春偵知寇騎數千自順聖川  
入營沙窩登率兵躡之大破其衆追至栲栳山斬二百  
餘級得所掠人畜八百有騎邊將自土木敗後畏縮無  
敢與寇戰登以八百人破敵數千騎軍氣為之一振捷  
聞封定襄伯予世券四月寇騎數千奄至登出東門戰  
佯北誘之入土城伏起敵敗走登度敵且復至令軍士  
齎毒酒羊豕楮錢偽為祭冢者見寇即棄走寇至爭飲



食之死者甚衆六月額森復以二千騎入寇登再擊却之越數日奉上皇至城外聲言送駕還登與同守者設計具朝服候駕月城内伏兵城上俟上皇入即下月城開額森及門而覺遂擁上皇去時鎮守中官陳公忌登會有發公奸賊者公疑登使之遂與登構帝謂于謙曰大同吾藩籬也公與登如是其何以守遣右監丞馬慶代公還登愈感奮初額森欲取大同為巢穴故數來攻及每至輒敗有一營數十人不還者敵氣懾始有還上

皇意上皇既還代王仕壘頌登功乞降敕獎勞兵部言  
登已封伯乃止二年登以老疾乞休舉石彪自代且請  
令其子嵩宿衛帝以嵩為散騎舍人不聽登辭是時邊  
患甫息登悉心措置思得公廉有為者與俱遂劾奏沈  
固廢事而薦尚書楊寧布政使年富又言大同既有御  
史又有巡按御史僉都御史任寧宜止巡撫宣府帝悉  
從之以年富代固而徵還固及寧其秋以疾召還登初  
至大同仕卒可戰者纔數百馬百餘匹及是馬至萬五

千精卒數萬屹然成巨鎮登去大同人思之初英宗  
過大同遣人謂登曰朕與登有姻何拒朕若是登奏  
曰臣奉命守城不知其他英宗銜之及復辟登懼不  
免首陳八事多迎合尋命掌南京中府事明年召還言  
官劾登結陳汝言獲召鞠實論斬宥死降都督僉事立  
功甘肅憲宗即位詔復伯爵充甘肅總兵官奏邊軍償馬  
艱甚至鬻妻子乞借楚慶肅三王府馬各千匹官酬其直  
從之用朱永等薦召掌中府事總神機營兵成化四年復

設十二團營命登偕朱永提督八年卒贈侯謚忠武登  
儀觀甚偉髯垂過腹為將兼智勇紀律嚴明料敵制勝  
動合機宜嘗以意造攪地龍飛天網鑿深塹覆以土木  
如平地敵入圍中發其機自相撞擊頃刻皆陷又倣古  
製造偏箱車四輪車中藏火器上建旗幟鉤環聯絡布  
列成陣戰守皆可用其軍以五人為伍教之盟於神祠  
一人有功五人同賞罰亦如之十伍為隊隊以能挽六  
十斤弓者為先鋒十隊領以一都指揮令功無相撓罪

有專責一時稱善登事母孝居喪東禮能詩明世武臣  
無及者無子以兄子嵩為子登謫甘肅留家京師嵩窘  
其衣食登妾縫紉自給幾殆弗顧登還欲黜之以其壻  
於會昌侯侯嘗活已隱忍不發及卒嵩遂襲爵後以非  
登嫡嗣止嵩身子參降錦衣衛指揮使

朱謙夏邑人永樂初襲父職為中都留守左衛指揮僉  
事洪熙時隸陽武侯薛祿征北有功進指揮使宣德元  
年進萬全都指揮僉事正統六年與參將王真巡哨至

巴延山遇寇擊走之次明安山遇烏梁海三百騎又敗之追至莽賚泉寇越山澗遁去乃還時謙已遷都指揮同知乃以為都指揮使八年充右叅將守備萬全左衛明年與楊洪破烏梁海兵於克爾蒐進都督僉事所部發其不法事帝以方防秋宥之復以北征功進都督同知帝北狩額森擁至宣府城下令開門謙與叅將紀廣都御史羅亨信不應遂去進右都督與楊洪入衛會寇已退追襲之近畿戰失利洪劾之兵部竝劾洪不救景

帝俱弗問洪入總京營廷議欲得如洪者代之僉舉謙  
乃進左都督充總兵官鎮守宣府景泰元年四月寇三  
百騎入喜峯口復由故道去降勅切責踰月復入犯謙  
率兵禦之次關子口寇數千騎突至謙拒以鹿角發火  
器擊之寇少却如是數四謙軍且退寇復來追都督江  
福援之亦失利謙卒力戰寇不得入六月復有二十騎  
南侵謙遣都指揮牛璽等往禦戰南坡謙見塵起率叅  
將紀廣等馳援自己至午寇敗遁論功封撫寧伯是時

寇氣甚驕屢擾宣府大同意二城且旦夕下而謙守宣  
府郭登守大同數挫其衆額森知二人難犯始一意歸  
上皇八月上皇還道宣府謙率子永出見厚犒其使者  
既而謙謬報寇五千騎毀牆入察之則額森貢使也詔  
切責之謙惶恐謝明年二月卒於鎮贈侯子永襲謙在  
邊久善戰然勇而寡謀故其名不若楊洪石亨郭登之  
著成化中謚武襄永字景昌偉軀貌顧盼有威初見上  
皇於宣府數目屬焉景泰中嗣爵奉朝請英宗復辟睹



永識之曰是見朕宣府者耶永頓首謝即日召侍左右  
分領宣威營禁軍天順四年宣大告警命帥京軍巡邊  
七年統三千營尋兼神機營憲宗立改督團營領三千  
營如故成化元年荆襄盜劉通作亂命永與尚書白圭  
往討進師南漳擊斬九百有奇會疾留南漳而去率大  
軍破賊永往會道遇餘賊俘斬數百人其秋復進討右  
龍馮喜皆捷論功進侯馮拉噶犯邊命佩將軍印會彰  
武伯楊信禦之會遣使朝貢乃班師六年阿勒楚爾寇

延綏復拜將軍偕都御史王越都督劉玉劉聚往討敗之蘇家寨寇萬騎自雙山堡分五道至戰於開荒川寇少却乘勢馳之皆棄輜重走至牛家寨遇都指揮吳瓚兵少寇圍之指揮李鵬滕忠至復力戰聚及都指揮范瑾神英分據南山夾擊寇乃大敗斬首一百有六獲馬牛數千阿勒楚爾中流矢遁時斬獲無多然諸將咸力戰追敵邊人以謂為數十年所未有論功予世侯阿勒楚爾雖少挫猶據河套明年正月屢入永所部屢有斬獲

三月復以萬餘騎分掠懷遠諸堡永興越等分兵為五  
設伏敗之追至山口及鴻和爾圖河寇敗走遊擊孫鉞  
蔡瑄別破他部於鹿塞山捷聞璽書獎勞永等再請班  
師皆不許寇復以二萬餘騎入掠擊退之歲將盡乃召  
永還留越總制三邊十四年加永太子太保明年冬拜  
靖虜將軍東伐以中官汪直監督軍務還進爵保國公又  
明年正月延綏告警命永為將軍越提督軍務直仍監  
督分道出塞越與直選輕騎出孤店關俘寇於威寧海

子而永率大軍由西路出榆林不見寇道回遠費兵食  
巨萬馬死者五千餘匹於是越得封伯直廕錫踰等而  
永無功賞不行久之進太子太傅十七年二月復偕直  
越出師大同禦伊斯瑪音獲首功百二十賜襲世公十  
九年秋小王子入邊宣大告急越與直已得賜以永為  
鎮朔大將軍中官蔡新監其軍督諸將周玉李璵等擊  
敗之還仍督團營或設匿名書言永圖不軌永乞解兵  
柄不許其冬手敕加太傅太子太師弘治四年監修太

廟成進太師永治軍嚴肅所至多奏功前後八佩將軍  
印內總十二團營兼掌都督府列侯勛名無與比九年  
卒追封宣平王謚武毅子暉嗣給事中王廷言永功不  
當公朝議止予襲一世後皆侯詔可暉字東陽長身美  
髯人稱其威重類父又屢從父塞下歷行陣時以為才  
弘治五年授勲衛年垂五十始嗣爵分典神機營十二  
年更置京營大帥命暉督三千營兼顧右府事和碩入  
大同平江伯陳銳等不能禦命暉佩大將軍印代之比

至寇已退乃還明年春和碩連小王子大入延綏寧夏  
右都御史史琳請濟師復命暉佩大將軍印統都督李  
俊李澄楊玉馬儀劉寧五將往而以中官苗達監其軍  
至寧夏寇已飽掠去乃與琳達率五路師搗其巢於河  
套寇已徙帳僅斬首三級獲馬駝牛羊千五百以歸未  
幾寇入固原轉掠平涼慶陽關中大震兩鎮將嬰城不  
敢戰而暉等畏怯不急赴比至斬首十二人還所掠生  
口四千遂以捷聞是役也大帥非制勝才師行紆迴無

紀律邊民死者徧塋諸郡困轉輸餉軍費八十餘萬他徵發稱是先後僅獲首功十五級廷臣連章劾三人罪帝不問已而上搢搢有功將士萬餘人尚書馬文升大學士劉健持之帝先入達等言竟錄二百十人署職一級餘皆被賚及班師帝猶遣中官齎羊酒迎勞言官極論暉罪終不聽以暉總督團營領三千營右府如故武宗即位寇大入宣府復命暉偕遼琳帥師往寇轉掠大同叅將陳雄擊斬八十餘級還所掠人口二千七百有

奇暉等奏捷列有功將士二萬餘人兵部侍郎閻仲宇  
大理丞鄧璋往勘所報多不實終以遠故衆咸給賜劉  
瑾用事暉等更奏錄功太薄請依成化間白狐莊例兵  
部力爭不納竟從暉言得擢者千五百六十三人暉加  
太保正德六年卒子麒襲侯嘗充總兵官鎮兩廣與姚  
鎮平田州誅岑猛加太子太保嘉靖初召還久之守備  
南京卒子岳嗣亦守備南京隆慶中卒四傳至孫國弼  
天啟中楊漣劾魏忠賢國弼亦乞速賜處分忠賢怒停



其歲祿崇禎時總督京營溫體仁柄國國弼抗疏劾之  
詔捕其門客及錄疏者下獄傳祿如初及至南京進保  
國公乃與馬士英阮大鍼相結以訖明亡

孫鏜字振遠東勝州人襲濟陽衛指揮同知用朱勇薦  
進署指揮使正統末擢指揮僉事充左叅將從總兵官  
徐恭討葉宗留敗賊金華復破之烏龍嶺英宗北狩景  
帝召鏜還起擢都督僉事典三十營額森將入犯進右  
都督充總兵官統京軍一萬禦之紫荆關將發寇已久

遂營都城外寇薄德勝門為于謙等所卻轉至西直門  
鏜與大戰斬其前鋒數人寇稍北鏜逐之寇益兵圍鏜  
鏜力戰不解高禮毛福壽來援禮中流矢會石亨兵至  
寇乃退詔鏜副楊洪追之戰於涿州深溝頗有斬獲師  
還仍典營務景泰初楊洪劾鏜下獄石亨請殺鏜江淵  
亦言城下之役惟鏜戰最力乃釋之三年冬充副總兵  
協郭登鎮大同登節制嚴鏜不得逞欲與分軍且令子  
百戶宏侮登帝械宏竟以鏜故貫之召還典三千營如

故英宗復辟以奪門功封懷寧伯尋予世券天順間甘肅告警詔鏜充總兵官帥京軍往討將陞辭病宿朝房夜二鼓太監曹吉祥昭武伯曹欽反其部下都指揮馬亮告變於恭順侯吳瑾瑾趨語鏜鏜草奏叩東長安門自門隙投入內廷始得集兵縛吉祥守皇城諸門鏜走太平侯張瑾家邀兵擊賊瑾不敢出鏜倉猝復走宣武街急遣二子輔軌呼征西將士給之曰刑部囚反獄獲者重賞衆稍聚至二千人始語之故時已黎明遂擊欽

欽方攻東長安門不得入轉攻東安門鏜兵追及賊稍散輒斫欽中膊輒亦被殺欽知事不成竄歸其家猶督衆拒鏜力戰至晡始定論功第一進爵世侯仍典三千營贈輒百戶世襲鏜麤猛善戰然數犯法初賄太監金英得遷都督事覺論斬景帝特宥之天順末以受將士賄屢被劾不自安求退詔解營務及府軍前衛事猶掌左府憲宗即位中官劉玉得罪鏜坐與玉婚停祿閒住尋陳情予半祿已復自陳功狀給祿如故成化七年卒

贈涑國公謚武敏子輔請嗣吏部言奪門功例不得世  
傳帝以鏜輔反者予之傳子至孫應爵正德中總督團  
營四傳至曾孫世忠萬厯中鎮守湖廣總督漕運凡二  
十年又三傳至孫維蕃流賊陷京師被殺鏜之冒奪門  
功封伯爵也都督董興及曹義施聚趙勝等皆乘是時  
冒封予世券興義聚自有傳趙勝字克功遷安人襲職  
為永平衛指揮使正統末禦寇西直門進都指揮僉事  
天順初與孫鏜等預奪門功起遷都督僉事又與鏜擊

反者曹欽進同知保喇犯甘肅勝與李杲充左右叅將  
從白圭西征至固原擊寇却之憲宗立典鼓勇營訓練  
成化改元山西告警拜將軍次雁門寇已退乃還明年  
復出延綏禦寇會方納款遂旋師尋典耀武營四年充  
總兵官鎮遼東七年召典五軍營已改三千營伽嘉色  
凌犯宣府詔勝為將軍統京兵萬人禦之亦以寇遁召  
還久之進左都督加太子太保十九年封昌寧伯勝初  
與李杲並有名後屢督大師未見敵無功夤緣得封名

大損後加太保營萬貴妃瑩墮崖石間死贈侯謚壯敏  
弘治初孫鑑乞襲爵吏部言勝無功不當傳世乃授錦  
衣衛指揮使

范廣遼東人正統中嗣世職為寧遠衛指揮僉事進指  
揮使十四年積功遷遼東都指揮僉事廣精騎射驍勇  
絕倫英宗北狩廷議舉將材尚書于謙薦廣擢都督僉  
事充左副總兵為石亨副額森犯京師廣躍馬陷陣部  
下從之勇氣百倍寇退又追敗之紫荆關錄功命實授

俄進都督同知士守懷來尋召還景泰元年二月亨出  
巡邊時都督衛穎統大營命廣協理三月寇犯宣府敕  
兵部會諸營將遴選將材僉舉廣命充總兵官偕都御  
史羅通督兵巡哨駐居庸關外數月還京副石亨提督  
團營軍馬亨所為不法其部曲多貪縱廣數以為言亨  
銜之譖罷廣止領毅勇一營又與都督張軌等不相能  
及英宗復辟亨軌恃奪門功誣廣黨附于謙謀立外藩  
遂下獄論死子昇戍廣西籍其家以妻孥第宅賜降丁



明年春軌早朝還途中為拱揖狀左右怪問之曰范廣過也遂得疾不能睡痛楚月餘而死成化初廷臣訟廣寃命子昇仍襲世職廣性剛果每臨陣身先士卒未嘗敗衄一時諸將盡出其下最為于謙所信任以故為儕輩所忌

贊曰楊洪石亨輩遭時多事奮爪牙之力侯封世券照耀一門酬庸亦過厚矣洪知盛滿可懼而亨邪狠粗傲怙寵而驕其赤族宜哉朱謙勇畧不及郭登登乃無後

而謙子永進爵上公子孫世侯勿絕孫鏜范廣善戰畧  
相等而廣以冤死所遇有幸有不幸相去豈不遠哉

明史卷一百七十三

欽定四庫全書

明史卷一百七十三考證

石亨傳十四年與都督僉事馬麟巡徼塞外至箭谿山  
敗烏梁海衆進都督同知

臣黃壽齡按三衛列傳

正統十四年烏梁海盜邊石亨擊敗之於箭谿山原  
刻作箭欲誤據改

石亨傳初帝命所司為亨營第既成壯麗踰制帝登翔  
鳳樓見之問誰所居恭順侯吳瑾謬對曰此必王府

帝曰非也瑾曰非王府誰敢僭踰若此帝領之

臣

黃壽齡按是時與瑾同侍側奏對者尚有撫寧伯朱永見獻徵錄謹附考

鄧登傳八月額森擁帝北去經大同使袁彬入城索金幣登閉門以飛橋取彬入登與安及侍郎郎沈固給事中孫祥知府霍瑄等出謁

臣

黃壽齡按識大錄

載是年十月額森挾英宗至大同知府霍瑄由水竇出謁英宗乃密諭登毋開城門是登固未嘗出謁袁

彬亦未入城與傳互異謹附識

朱謙傳景泰元年四月寇三百騎入石峯口

臣黃壽

齡按石峯原刻誤作石峰謹據地理志改

孫鐘傳天順間甘肅告警詔鐘充總兵官帥京軍往討

臣黃壽齡按曹吉祥之叛在天順五年七月是年

六月保喇八河西官軍敗績故命鐘往見明實錄原  
刻作天順初未合今改間字謹識

明史卷一百七十三考證

欽定四庫全書

明史卷一百七十四

大學士張廷玉等奉 敕修

列傳第六十二

史

昭劉

昭

李

達

巫

凱

曹施

義聚

許

貴子

寧

周

賢

子

玉

歐信

王

璽

魯

鑑子

麟

孫

經

劉

寧

周莊

璽鑑

彭清

姜

漢子

應熊

安國

杭雄

史昭合肥人永樂初積功至都指揮僉事八年充總兵  
官鎮涼州土軍婁達哈先與千戶呼巴作亂呼巴敗婁  
達哈就撫昭上書言其必叛狀未至而婁達哈果叛昭  
與都指揮滿都等擊平之移鎮西寧仁宗立進都督僉  
事上言西寧風俗鄙悍請設學校如中土報可宣德初  
昭以衛軍守禦不暇屯種其家屬願力田者七百七十



餘人請俾耕藝收賦以足軍食從之五年庫森衛都指揮使薩奇蘇邀劫西域使臣昭率參將趙安中官王安王瑾討之長驅至庫森薩奇蘇望風遁擒其黨達勒達布哈等獲男女三百四十人馬駝牛羊三十餘萬威震塞外捷聞璽書慰勞賞賚加等七年春以征西將軍鎮寧夏博迪達爾瑪犯邊遣兵擊之至庫爾台察罕俘獲甚衆進都督同知正統初昭以寧夏孤懸河外東抵綏德二千里曠遠難守請於花馬池築哨馬營增設烽堠

直接哈喇烏遜邊備大固尋進右都督時阿勒台多爾濟巴勒數寇邊詔昭與甘肅守將蔣貴趙安進勦並無功被詔切責貶都督僉事三年復右都督八年以老召還明年卒昭居寧夏十二年老成持重兵政修舉亦會敵勢衰弱邊境得無事兵部尚書王驥寧夏參將王榮嘗舉其過朝議以昭守邊久習兵事不易也而與昭並為邊將最久有勲績可稱者都督同知劉昭鎮西寧二十年都指揮李達鎮洮州至四十年並為蕃漢所畏服

劉昭全椒人永樂五年以都指揮同知使朶甘烏思藏  
建驛站還至靈藏番賊邀劫昭敗之進都指揮使鎮河  
州宣德二年副陳懷討平松潘寇累進都督同知移西  
寧復鎮河州兼轄西寧罕東酋扎爾結邀殺中官使西  
域者奪璽書金幣去命昭副甘肅總兵官劉廣討之扎  
爾結請還所掠書幣貢馬贖罪帝以窮寇不足深治命  
昭等還李達定遠人累官都督僉事正統中致仕

巫凱句容人由廬州衛百戶積功至都指揮同知永樂

六年以從英國公張輔平交趾功遷遼東都指揮使十  
一年召帥所部會北京明年從征沙漠命先還凱言諸  
衛兵宜以三之二守禦而以其一屯糧開原市馬悉給  
本衛乘操從之宣宗立以都督僉事佩征虜前將軍印  
代朱榮鎮遼東時中國人自塞外脫歸者令悉送京師  
俟親屬赴領凱言遠道往來恐致失所阻遠人慕歸心  
乃更令有馬及少壯者送京師餘得自便敵掠西山凱  
擊敗之盡得所掠者降敕褒勉帝嘗遣使造舟松花江

招諸部地遠軍民轉輸大困多逃亡會有警凱力請罷其役而逃軍入海西諸部者已五百餘人既而造舟役復興中官阮堯民都指揮劉清等董之多不法致激變凱劾堯民等下之吏英宗登極進都督同知上言邊情八事請厚恤死事者家益官吏折俸鈔歲給軍士冬衣布棉軍中口糧芻粟如舊制且召商實邊俱允行未幾為兵部尚書王驥所劾朝廷知凱賢令凱自陳并諭廷臣文武官有罪得實始奏誣者罪不貸凱由是得行其

志正統三年十二月有疾命醫馳視未至而卒凱性剛  
毅饒智畧馭衆嚴而有恩在遼東三十餘年威惠並行  
邊務修飭前後守東陲者曹義外皆莫及義字敬方儀  
真人以燕山左衛指揮僉事累功至都督僉事副凱守  
遼東凱卒代為總兵官凱名將義承其後廉介有守遼  
人安之烏梁海犯廣寧前屯詔切責命王翱往飭軍務  
劾義死罪頃之義獲犯邊貝台等詔戮於市自是義數  
與烏梁海戰正統九年會朱勇軍夾擊斬獲多進都督

同知累官左都督義在邊二十年無赫赫功然能謹守  
邊陲其麾下施聚焦禮等皆至大將英宗復辟特封義  
豐潤伯聚亦封懷柔伯居四年義卒贈侯諡莊武繼室  
李氏殉詔旌之施聚其先沙漠人居順天通州父忠為  
金吾右衛指揮使從北征陣歿聚嗣職宣德中備禦遼  
東累擢都指揮同知以義薦進都指揮使義與烏梁海  
戰聚皆從額森逼京師景帝詔聚與焦禮俱入衛聚慟  
哭即日引兵西部下進牛酒聚揮之曰天子安在吾屬

何心饗此比至寇已退乃還聚以勇敢稱官至左都督  
值英宗推恩得封伯後義二年卒贈侯諡威靖義三傳  
至棟聚四傳至瑾吏部皆言不當復襲世宗特許之傳  
爵至明亡

許貴字用和江都人永新伯成子也襲職為羽林左衛  
指揮使安鄉伯張安舉貴將才試騎射及策皆最擢署  
都指揮同知尋以武進伯朱冕薦擢山西行都司督操  
大同諸衛士馬正統末守備大同西路額森入寇從石



亨戰陽和後日敗績貴力戰得還英宗北狩邊城悉殘  
破大同當敵衝人心尤恟懼貴以忠義激戰士敵來擊  
敗之進都指揮使景泰元年春充右參將敵寇威遠追  
敗之蒲州營奪還所掠人畜敵萬騎逼城下禦却之再  
遷都督同知大同乏馬命求民間得八百餘匹所司不  
給直貴為請乃予之嘗募死士入賊壘劫馬百餘悉畀  
戰士士皆樂為用分守中官韋力轉淫虐衆莫敢言貴  
劾奏之三年疾還京英宗復辟命理左府事尋調南京

松潘地雜番苗密邇董卜韓胡舊設參將一人天順五年守臣告警廷議設副總兵以貴鎮守未抵鎮而山都掌蠻叛詔便道先翦之貴分兩哨直抵其巢連破四十餘砦斬首千一百級生擒八百餘人餘賊遠遁貴亦感嵐氣未至松潘卒帝為輟朝一日賜賻及祭葬如制子寧字志道正統末自以舍人從軍有功為錦衣千戶貴歿嗣指揮使用薦擢署都指揮僉事守禦柴溝堡成化初充大同遊擊將軍寇入犯與同官秦傑等禦之小龍

州澗擒其右丞巴圖等十一人改督宣府操練移延綏  
地逼河套寇數入掠孤山堡寧提孤軍奮擊之三戰皆  
捷寇渡河走明年復以三千騎入沙河墩與總兵官房  
能禦之寇退復掠康家岔寧出塞百五十里追與戰獲  
馬牛羊千餘而還時能守延綏無將畧巡撫王銳請濟  
師詔大同巡撫王越帥衆赴越遣寧出西路破敵黎家  
澗進都指揮同知復遣寧與都指揮陳輝追寇獲馬騾  
六百朝廷以阿勒楚爾復入河套頻擾邊命越與朱永

禦以寧才擢都督僉事佩靖虜副將軍印代能充總兵官寧起世胄不十年至大將同列推讓不及父友多隸部下亦不以為驟踰月寇大入永遣寧及遊擊孫鉞禦之至博囉堡相持三日夜寇乃解去亡失多寧以力戰得出卒被賞至冬賊人安邊寧追擊有功七年又與孫鉞祝雄等敗寇於鴻和忽圖河璽書褒獎迤北開元王巴哈博囉屢欲降內懼朝廷見罪外畏阿勒楚爾讐之徬徨不決寧請撫慰以固其心卒降之明年參將錢亮

敗績於師婆澗士卒死者十三四寧與越等俱被劾帝  
不罪時們都埒等屢犯延綏寧帥鎮兵力戰寇不得志  
乃出西路直犯環慶固原寧將輕騎夜襲之鴨子湖奪  
馬畜而還又明年寇入榆林澗與巡撫余子俊敗之們  
都埒等大入西路留其家紅鹽池越乘間與寧及宣府  
將周玉襲破其巢進署都督同知與子俊築邊牆增營  
堡寇患少衰十八年寇分數道入寧威之邊牆獲級百  
二十子實授時越方鎮大同命寧與易鎮至則與鎮守

太監汪直不協巡撫郭鏜以聞調直南京小王子大入  
寧知敵勢盛欲持重俟隙乃斂兵守而別遣將劉寧黃  
升與周璽相犄角寇大掠焚代王別堡王趣戰使衆哭  
於轅門寧憤與鏜等營城外寇以十餘人為誘太監蔡  
新部騎馳擊寧將士爭赴之遇伏大敗死者千餘人寧  
奔夏米莊鏜新馳入城會璽等來援寇乃退寧還陣亡  
家婦子號呼詬詈擲以瓦礫寧大喪氣已而寇復入劉  
寧宋澄莊鑑等禦之十戰少利寇退寧等掩其敗更以

捷聞巡按程春震發之與鏜新俱下獄鏜降六官新以  
初任降三官寧降指揮同知間住弘治中用薦署都指  
揮使分領操練十一年十二月卒贈都督僉事寧束髮  
從軍大小百十餘戰身被二十七創性沉毅守官廉待  
士有恩不屑干進劉寧神英李杲皆出麾下子泰自有  
傳

周賢滁人襲宣府前衛千戶景泰初累功至都指揮僉  
事守備貓兒峪助副總兵孫安守實巴爾城尋充右參

將代安鎮守烏梁海入寇總兵官過興令宣府副將楊信及賢合擊賢不俟信徑擊敗之信被劾都御史李秉言信緩師賢亦棄約帝兩宥之天順初總兵官楊能奏賢擢都督僉事寇駐塞下能檄賢與大軍會失期徵下獄以故官赴寧夏隸定遠伯石彪寇二萬騎入安邊營彪率賢等擊之連戰皆捷追至野馬澗半坡墩寇大敗而賢追不已中流矢卒詔贈都督同知賢初下吏自以不復用及得釋感激誓死報竟如其志子玉字廷璧當



嗣指揮使以父死事超二官為萬全都司都指揮同知  
督理屯田進都指揮使充宣府遊擊將軍九年會昌侯  
孫繼宗等奉詔舉將才玉為首詔率所部援延綏從王  
越襲紅鹽池進署都督僉事還守宣府寇入馬營赤城  
擊敗之兵部言宣府諸大帥無功玉所部三千人能追  
敵出境請加一秩酬其勞乃予實授尋充宣府副總兵  
十三年佩征朔將軍印鎮宣府破敵紅崖追奔至水磨  
灣進署都督同知十七年五月寇復入參將吳儼少監

崖榮追出塞至薩巴爾圖為所遮兵分為三皆被圍儼榮走據北山因甚守備張澄率兵進力戰解二圍抵北山下儼榮已夜遁澄拔其衆而還死者過半澄所部七百人亦多戰死詔錄澄功治儼等罪玉先以葛谷堡赤城頻受掠凡三被論至是復以節制不嚴見劾帝皆置不問十九年小王子犯大同敗總兵官許寧入順聖川大掠以六千騎寇宣府玉將二千人前行巡撫秦紘兵繼進至白腰山擊敗之指揮曹洪邀擊至西陽河都指

揮孫成亦敗寇七馬房時寇乘勝氣甚銳竟為玉等所挫一時稱其功未幾寇復入玉伏兵敗之朱永至大同復會玉軍擊敗之鵠鵠峪進署右都督余子俊築邊牆玉不為力且與絃不相能子俊惡之奏與寧夏神英易鎮久之復移鎮甘肅孝宗嗣位實授右都督玉督邊牆工峻急部卒張伏興等以瓦石投之兵部言悍卒漸不可長遂戮伏興戌其黨土魯番貢獅子願獻還哈密城及金印贖所留使者玉為之奏帝命與巡撫王繼經畫

既果來歸玉等皆受賚七年病歸尋卒諡武僖玉初為偏裨及鎮宣府甚有名後涖甘肅部下屢失事又侵屯田死後事發子襲職降二等

歐信嗣世職金吾右衛指揮使景泰三年以廣東破賊功擢都指揮同知已命守備白羊口遷大寧都指揮使天順初以都督僉事充參將守備廣東雷廉諸府巡撫葉盛薦其廉勇進都督同知代副總兵翁信兩廣搖擻陷開建殺官吏帝趣進兵信破賊化州之馬里村再破

之石城擊斬海南衛反者邵瑄時所在盜羣起將吏不能定廣西參將范信守潯梧徭盡在境內陰納徭賂縱使越境流劫約毋犯已於是雷廉高肇悉被寇帝命廣西總兵官陳涇及信合勦時有斬馘而賊勢不衰朝廷猶倚范信會涇以罪徵乃擢范信都督僉事充副總兵鎮廣東而命信佩征蠻將軍印代涇鎮廣西成化元年賊掠英德諸縣信討斬五百餘人奪還人口韓雍督師令信等分五哨攻破大藤峽已而餘賊復入潯州信被

劾獲宥召還理前府事七年春充總兵官鎮守遼東累敗福餘三衛言者謂信已老請召還巡撫彭誼奏官軍耆老五千餘人皆言信忠謹有謀勇累立戰功威鎮邊陲年六旬騎射勝壯士不宜召回乃留鎮如故久之陳鉞代誼鉞貪功信不能違十四年為巡按王崇之所劾其冬乃召歸尋遣中官汪直等往按直右鉞歸罪信等下獄鐫一官閒住飲恨而卒范信既徙廣東賊勢愈盛劫掠不止乃語人曰今賊仍犯廣東亦我遣之耶而是

時都督顏彪佩征夷將軍印討賊久無功濫殺良民報捷嶺南人咸疾之

王璽太原左衛指揮同知也成化初擢署都指揮僉事守禦黃河七墅巡撫李侃薦於朝阿嚕出寇延綏命充遊擊將軍赴援戰孤山堡敗之寇再入戰漫天嶺劉宗塢及滿達勒水磨川皆有功進都指揮同知充副總兵鎮寧夏九年以將才與周玉同薦十二年擢署都督僉事充總兵官鎮守甘肅黃河以西自莊浪抵肅州南

山其外番人昂吉等二十九族所居也洪武間立石畫界約樵牧毋越疆歲久湮廢諸番往往闌入而中國無賴人又潛與交通為邊患璽請復畫疆域召集諸番諭以界石廢恐官軍欺凌諸部今復立之聽界外駐牧互市則入關如此番人必聽命可潛消他日憂帝稱善從之十七年進署都督同知時璽以都督僉事為總兵官而魯鑑以署都督同知為參將璽恐難於節制乞解兵柄故有是命初哈密為土魯番所擾使其將伊蘭守之



都督哈商寄居苦峪口近赤斤罕東數相攻哈商勢窮  
援撫朝議敕璽築城苦峪別立哈密衛以居之璽遣課  
者間伊蘭伊蘭不聽得其所羈掠九十餘人以歸具悉  
虛實十七年召集赤斤罕東將士犒以牛酒令助哈商  
哈商合二衛兵夜襲哈密及拉們等八城遂復其地仍  
令哈商居之事聞獎勞資金幣已罕東入寇璽禦却之  
請興師以討帝念其常助哈商第遣使責諭明年北寇  
殺哨卒璽率參將李俊及赤斤兵擊之於狼心山黑河

西多所斬獲二十年移鎮大同墾有復哈密功官不進  
陳於朝乃實授都督同知墾習韜畧諳文事勇而有謀  
廷臣多稱之在邊二十餘年為番人所憚弘治元年卒  
賜祭葬贈卹有加

魯鑑其先山西大同人祖阿實克圖袞布沙克嘉明初  
率部落歸附太祖授百夫長俾統所部居莊浪傳子沙  
克嘉累官莊浪衛指揮同知正統末嗣父職後擢署都  
指揮僉事成化四年固原滿四反率土兵千人從征諸

軍圍石城日挑戰鑑出則先驅入則殿後最為賊所憚  
賊平進署都督同知尋充左參將分守莊浪命其子麟  
為百戶統治土軍十七年坐寇入境戴罪立功尋充左  
副總兵協守甘肅寇犯永昌被劾鑑疏辨第停其俸兩  
月俄命充總兵官鎮守延綏自陳往功予實授孝宗立  
得疾致仕弘治初命麟襲指揮使加都指揮僉事已進  
同知充甘肅遊擊將軍魯氏世守西陲有捍禦功至鑑  
官益顯其世業益大而所部土軍生齒又日盛麟既移

甘肅帝以土軍非鑑不能治特起治之且命有司建坊旌其世績鑑乃條上邊務四事多議行鑑有材勇遇敵輒冒矢石數被傷不為沮故能積功至大將十五年以舊創疾發卒贈右都督賜卹如制時麟已由甘肅參將擢左副總兵豪傑如其父而恭順不如先為遊擊時寇入永昌失律委罪副將陶禎下御史按當戍邊但貶一秩遊擊如故暨為副將調韋州禦寇寇大入不能擊遣都指揮楊琳邀之孔壩溝琳大敗不救連被劾麟自愬

止停俸二月時已授麟子經官令約束土軍而麟奏經  
幼土人不受約束乞歸治之不俟報徑歸帝用劉大夏  
言從其請武宗立甘肅巡撫畢亨薦經及麟謀勇令率  
所部協戰守正德二年經既襲指揮使自陳嘗隨父有  
功乃以為都指揮僉事未幾麟卒贈都督僉事賜祭葬  
故事都指揮無卹典以經乞破例予之經積戰功再遷  
都指揮使充左參將分守莊浪復自陳功闕兵部執不  
可帝特命為署都督僉事世宗立乞休巡撫許鳳翔言

經力戰被創疾行愈且世將敢戰知名異域今邊患棘  
不宜聽其去帝乃諭留且勞以銀幣尋充副總兵分守  
如故嘉靖六年冬以都督同知充總兵官鎮守延綏大  
學士楊一清言經守莊浪二十餘載屢立戰功其部下  
土軍非他人所能雖其子瞻已為指揮僉事而奉命統  
轄然年尚少今陝西總兵官張鳳乃延綏世將若調鳳  
延綏而改經陝西自可彈壓莊浪無西顧患帝立從之  
居二年竟以疾致仕久之命瞻以本官守備山丹經奏

言自臣高祖後世守茲土今臣家居瞻又移他鎮土軍  
皇皇不欲別附若因此生他患是隳先業而負世恩也  
乞令守故業可二十二年宣大有警詔經簡壯士五千  
赴援至而邊患已息乃遣還以經力疾趨召厚賚之明  
年瞻卒經以次子及孫皆幼請得自轄土軍詔許之經  
驍勇奉職寡過繼祖父為大帥保功名稱良將三十五  
年卒賜卹如制

劉寧字世安其先山陽人襲世職為永寧衛指揮使勇

敢善戰自以冗散無所見會延綏用兵疏請效死尚書  
白圭許之屢以功遷都指揮使充宣府遊擊將軍周璽  
字廷玉遷安人嗣職為開平衛指揮使負氣習兵書善  
騎射以征北功擢署都指揮僉事充右參將分守陽和  
敕部兵三千訓練聽調成化十六年從王越征威寧海  
子累進都指揮使時邊寇無虛歲十八年分道入掠璽  
與遊擊董昇戰黑石崖寧戰塔喇山皆有功璽進署都  
督僉事遷大同副總兵寧進都督僉事改左參將分守



陽和十九年秋伊斯瑪音大入大同總兵官許寧分遣  
壘守懷仁寧與董昇營西山自將中軍擊之夏米莊敗  
績寧昇被圍數重幾陷亟發巨礮擊之敵多死圍乃解  
壘聞中軍失利亟還兵援夜遇敵乘勝前銳甚壘厲將  
士曰今日有進無退大呼陷陣敵少却久之短兵接臂  
中流矢拔鏃戰益急與子鵬及麾下壯士擊殺數十人  
會寧兵至中軍潰卒亦稍集敵乃退許寧等亦還無何  
復入掠寧將兵三千遇之聚落站西連戰敗之復敗之

白登柳林又追敗之小鵲鵠谷而大同西路參將莊鑑亦邀其歸路戰於牛心山敵遂遁時諸將多失利許寧以下獲罪而璽以功予實授寧超遷都督同知莊鑑以所部無失亡亦賚銀幣鑑遼東人天順中襲定遼右衛指揮使驍猛有膽決遇賊輒奮數有功累官都督僉事掌左府弘治十一年佩鎮朔將軍印鎮宣府以才與大同總兵官張俊易鎮兵部侍郎熊繡奏其經畫功進都督同知璽尋以右副總兵分守代州兼督偏頭諸關而

改寧左副總兵協守大同二人並著功北邊稱名將璽  
以偏頭去太原遠請改分守為鎮守又以鎮守不當聽  
節制乞易總兵銜憲宗皆曲從之弘治初移鎮陝西討  
平扶風諸縣附籍回回三年佩征西將軍印鎮守寧夏  
甫一歲卒且死召諸子曰吾佩印分閫分已足獨未嘗  
大破敵抱恨入地矣連呼殺賊而瞑子鵬累官錦衣衛  
指揮僉事璽歿後三年而寧佩平羌將軍印鎮甘肅其  
冬寇犯涼州寧與戰抹山墩擒斬五十餘相持至暮收

輜重南行寇復來襲擒其長一人明日參將顏玉來援副將陶禎兵亦至寇乃遁俘其稚弱獲馬駝牛羊二千進右都督明年與巡撫許進襲破土魯番於哈密進左都督增俸百石以疾還京十三年大同告警命寧為副總兵從平江伯陳銳禦之銳無將略與寧不協止毋戰寇遂得志去坐停半俸閒住尋以參將贊畫朱暉軍務亦無功寧自陳哈密功乞封伯詔還全俸寧有膽智為大同副將時入貢者數萬人懷異志寧率二十騎直抵

其營衆駭愕有部長勒馬引弓出寧前下馬與諸部長  
坐舉策指畫宣天子威德一人語不遜寧捫其面奮臂  
起其長叱之退寧復坐與語呼酒歡飲皆感悟卒如約  
嘗仿古番上法以五十八人為隊隊伍重為陣建五色  
幟又各建五巨幟於中軍中幟起五陣各視其色應之  
循環無端每戰用是取勝晚再赴大同已老病帥又怯  
懦故無成功然孝宗朝良將稱寧十七年卒贈廣昌伯  
彭清字源潔榆林人初襲綏德衛指揮使以功擢都指

揮僉事弘治初充右參將分守肅州寇入犯率兵躡之  
獲馬駝器仗及所掠人畜而還尋與巡撫王繼恢復哈  
密有功清雖位偏校而好謀有勇略名聞中朝尤為尚  
書馬文升所器嘗引疾乞休文升力言於朝慰留之八  
年甘肅有警以文升薦擢左副總兵仍守甘肅未幾巡  
撫許進乞移清涼州而是時哈密復為土魯番所據文  
升方密圖恢復倚清成功言肅州多故而清名著西域  
不可易乃寢文升既得楊翥策銳欲搗哈密襲伊蘭乃

發罕東赤斤暨哈密兵令清統之為前鋒從許進潛往  
行半月抵其城下攻克之伊蘭已先遁乃撫安哈密遺  
種全師而還是役也文升授方畧擬從間道往而進仍  
由故道伊蘭遂逸去斬獲無幾然番人素輕中國謂不  
能涉其地至是始知畏清功居多稍遷都指揮使十年  
總兵官劉寧罷擢清都督僉事代之其冬土魯番歸哈  
密忠順王善巴且乞通貢西域復定屢辭疾請解兵柄  
不允十五年卒清御士有恩久鎮西陲威名甚著番夷

憚之性廉潔在鎮遭母及妻妹四喪貧不能歸葬卒之日將士及庶民婦豎皆流涕遺命其子不得受賻贈故其喪亦不能歸帝聞之命撫臣發帑錢資送歸里賜祭葬如制

姜漢榆林衛人弘治中嗣世職為本衛指揮使御史胡希顏薦其材勇進都指揮僉事充延綏遊擊將軍十八年春寇犯寧夏興武營漢帥所部馳援遇於中沙墩擊敗之賜敕獎勞武宗嗣位寇大舉犯宣大漢偕副總兵



曹雄參將王戟分道援有功尋代雄為副總兵協守延綏正德三年移守涼州明年冬擢署都督僉事充總兵官鎮寧夏漢馭軍嚴整得將士心甫數月而安化王寘鐫謀逆置酒召漢及巡撫安惟學等宴酒半其黨何錦等率衆入即座上執漢漢奮起怒罵不屈遂遇害子奭逃免賊平訟於朝詔賜祭葬有司為立祠春秋祭之嘉靖時復從巡撫張珩請賜額憫忠爽當嗣職帝以漢死事特進一官為都指揮僉事十一年回賊魏景陽作亂

華陰諸縣悉被害巡撫蕭翀檄與討之獲景陽進署都  
指揮同知充右參將守肅州嘉靖二年擢右副總兵分  
守涼州進署都督僉事充總兵官鎮甘肅回賊犯甘州  
與戰張欽堡敗走之未幾西海賊八千騎犯涼州與  
率遊擊周倫等襲擊於苦水墩大敗之斬首百餘級殲  
其長還所掠人口千二百畜產二千都指揮張錦亦戰  
死錄功進署都督同知濟農他部寇莊浪與遇分水  
嶺再勝之遂至平嶺敵騎大集與伏兵誘之復斬其長

一人獲首功七十予實授十六年春寇大入甘州不能禦貶二秩戴罪尋以永昌破敵功復署都督僉事其冬坐前罪罷久之以薦擢副總兵協守大同為總督翁萬達劾罷卒子應熊嗣指揮使擢宣府西路參將二十七年春諳達寇大同總兵官周尚文戰曹家莊應熊從萬達自懷來鼓譟揚塵而西寇不測衆寡遂遁累進都督僉事充總兵官鎮守寧夏三十二年套寇數萬騎屯賀蘭山遣精騎掠紅井應熊戒將士固守以綴敵而潛師

攻敵營斬首百四十級進都督同知越二年套寇數萬  
踏冰西渡由寧夏山後直抵莊涼應熊等掩擊獲首功  
百餘進右都督御史崔棟劾其縱寇褫職逮問充為事  
官赴塞上立功四十年秋寇六萬餘騎犯居庸岔道口  
應熊被圍於南溝中五鎗墮馬參將胡鎮殺數人奪之  
歸其冬復為右都督充總兵官鎮守大同以招徠塞外  
人口增俸一級四十二年寇大舉犯畿輔詔應熊等入  
援諸鎮兵盡集見敵勢盛不敢擊給事中李瑜遂劾應

熊及宣大總督江東保定總兵官祝福坐視胡鎮被圍  
一卒不發帝怒降敕嚴責會寇將遁應熊禦之密雲頗  
有斬獲寇退帝令江東第諸將功以應熊為首詔增其  
祖職二級已錄防秋勞進左都督總督趙炳然劾其縱  
寇互市殘害朔州坐戍邊穆宗立赦還子顯祚襲職累  
官署都督僉事總兵官歷鎮山西宣府子弼亦至都督  
僉事為援遼總兵官姜氏為大將著邊功凡五世

安國字良臣綏德衛人初為諸生通春秋子史知名里

中後襲世職為指揮僉事正德三年中武會舉第一進署指揮使赴陝西三邊立功劉瑾要賄國同舉六十人咸無貲瑾乃編之行伍有警聽調禁其擅歸六十人者悉大窘儕於戍卒不聊生而邊臣憚瑾竟無有收恤之者寘鐸反肆赦始放還通政叢蘭請收用瑾怒諷給事中張瓚等劾諸人皆庸才悉停其加官瑾誅始以故官分守寧夏西路尋進署都指揮僉事充右參將擢右副總兵協守大同徙延綏十一年冬寇二萬騎分掠偏頭

關諸處國偕遊擊杭雄馳敗之苛嵐州斬首八十餘級  
獲馬千餘匹寇遂遁初寇大入白羊口帝遣中官張忠  
都督劉暉侍郎丁鳳統京軍討之比至已飽掠去忠暉  
恥無功紀功御史劉澄甫攘國等功歸之大行遷賞忠  
等悉增祿予世廕尚書王瓊亦加少保廕子錦衣國時  
以署都督僉事為寧夏總兵官僅予實授意不平不敢  
自列乃具疏力辭為部卒重傷者乞敘錄瓊請再叙國  
功始進都督同知當是時佞倖擅朝債帥風大熾獨國

以材武致大將端謹練戎務所至思盡職推將材者必  
歸焉在鎮四年卒特諡武敏


杭雄字世威世為綏德衛總旗雄承蔭數先登積首功  
六遷至指揮使正德七年進署都指揮僉事勦賊四川  
尋守備西寧用尚書楊一清薦擢延綏遊擊將軍從都  
御史彭澤經略哈密偕副將安國破敵岢嵐進都督僉  
事改參將擢都督同知統邊兵操於西內武宗幸宣府  
大同雄扈從即拜大同總兵官嘉靖初汰傳奉官雄當



貶以方守邊命署都督僉事鎮守如故小王子萬餘騎入沙河堡雄戰却之未幾復大入不能禦求罷不許移延綏召僉書後軍都督府三年秋土魯番侵甘肅詔尚書金獻民視師以雄佩平虜大將軍印充總兵官提督陝西延綏寧夏甘肅四鎮軍務列侯出征始佩大將軍印無授都督者至是特以命雄甫至寇已破走而雄亦得廕錦衣千戶既班師復出鎮寧夏濟農大入總督王憲檄雄等破之進都督同知寇八千騎乘冰犯寧夏雄

及副總兵趙鎮禦之前鋒陷伏中雄等皆敗總督王瓊  
劾之奪官閒住明年卒雄敢戰嘗以數騎行邊敵虜至  
乃下馬積鞍為壘跪而射之敵退解衣腋凝血乃知中  
飛矢武宗在大同見雄羶帷敝甚曰老杭窮乃爾寇至  
帝將親擊雄叩馬諫曰主人畜犬不使吠盜奚用犬為  
願聽臣等効力帝笑而止少役延綏巡撫行臺既貴每  
至臺議事不敢正席坐曰此當年役所也正德嘉靖間  
西北名將馬永而下稱雄云

贊曰時平則將畧無由見或綰符出鎮守疆禦侮著有  
勞效以功名終亦足尚矣許貴周賢魯鑑姜漢家世為  
將勲閥相承而賢與漢死事尤烈彭清杭雄之清節斯  
又其最優者歟



明史卷一百七十四

欽定四庫全書

明史卷一百七十四考證

巫凱傳值英宗推恩得封伯後義二年卒贈侯謚威靖

臣黃壽齡按識大錄義封豐潤伯勲號奉天翊衛

宣力武臣階特進榮祿大夫食祿一千三百石推恩  
三代賜鐵券未幾以義年高不欲使居邊戍召還入  
見慰勞甚至賜羊酒居京師奉朝請久之以疾卒時  
天順庚辰正月也享年七十有一史未詳載謹附識

魯鑑傳其先山西大同人

臣黃壽齡按大同山西屬

其先西大同句擬于西字上增山字謹識

劉寧傳璽歿後三年而寧佩平羌將軍印鎮甘肅

臣

黃壽齡按鎮甘肅考識大錄作鎮守大同甘肅謹附  
識

劉寧傳嘗仿古番上法以五十八人為隊

臣黃壽齡

按五十八人為隊考識大錄以五十人為隊與此互

異謹附

欽定四庫全書

史部  
明史卷一百七十五

御史<sub>臣</sub>李陽斌覆勘

總校官編修<sub>臣</sub>朱 鈐

欽定四庫全書

明史卷一百七十五

大學士張廷玉等奉敕修

列傳六十三

衛青

重興

河洪

劉玉

仇鉞

神英

子周

曹雄

馮禎



張

俊

李

鉉

楊

銳

崔

文

衛青字明德松江華亭人以蘇州百戶降成祖積功至  
都指揮僉事莅中都留守司事改山東備倭永樂十八  
年二月蒲臺妖婦林三妻唐賽兒作亂自言得石函中  
寶書神劍役鬼神剪紙作人馬相戰鬪徒衆數千據益  
都卸石柵塞指揮高鳳敗歿勢遂熾其黨董彥昇等攻  
下呂卽墨圍安邱總兵官安遠侯柳升帥都指揮劉忠  
圍賽兒寨賽兒夜劫官軍軍亂忠戰死賽兒遁去比明

升始覺不及追獲賊黨劉俊等及男女百餘人而賊攻安邱益急知縣張撫丞馬撝死戰賊不能下合莒即墨衆萬餘人以攻青方屯海上聞之率千騎晝夜馳至城下再戰大敗之城中亦鼓譟出殺賊二千生禽四千餘悉斬之時城中旦夕不能支青救稍遲城必陷比賊敗升始至青迎謁升怒其不待已梓之出是日鰲山衛指揮王真亦以兵百五十人殲賊諸城賊遂平而賽兒卒不獲帝賜書勞青切責升尚書吳中等劾升且言升媚

青功于是下升獄而擢青山東都指揮使真都指揮同知旗撫左右叅議賞賚有差青還備倭海上尋坐事繫獄宣德元年帝念其功釋之俾復職時京師營繕役繁調及防海士卒青以為言得番代英宗立進都督僉事尋卒青有孝行善撫士卒居海上十餘年海濱人思之請于朝立祠以祀次子穎正統初襲濟南衛指揮使景帝立奉詔入衛再遷至都指揮同知以石亨薦擢署都督僉事管五軍營右哨論黃花鎮白羊口及西直門禦

寇功累進都督同知景泰三年協鎮宣府逾年召還天  
順元年以奪門功封宣城伯予世券出鎮甘肅保喇入  
犯不能禦為有司所劾詔不問亨敗穎以守邊故得無  
奪憲宗即位廷議以穎不勝任乃召還會盡草奪門世爵  
穎以天順間征西番瑪吉思棟沙克諸族功自懇詔如  
故成化二年為遼東總兵官尋引疾罷級事中陳鉞等  
劾之下獄尋宥之弘治中卒贈侯謚壯勇傳子至孫鐸  
嘉靖時督神機營屢加太保兼太子太師四傳至時春

崇禎時掌後府京師陷懷鐵券闔門十七人皆赴井死  
董興長垣人初為燕山右衛指揮使累遷署都指揮同  
知正統中新建伯李玉等舉興將才進署都指揮使京  
營管操復用薦擢署都督僉事充右叅將從寧陽侯陳  
懋討鄧茂七破餘黨于建寧進都督同知南海賊黃蕭  
養圍廣州安鄉伯張安都指揮王清戰死賊衆攻城益  
急詔拜興左副總兵調江西兩廣軍往討而以侍郎孟  
鑑贊理軍務興用天文生馬軾自隨興果銳不能戢下

軾戒之景泰元年二月師至廣州賊舟千餘艘勢甚熾而徵兵未至諸將請濟師軾曰廣民延頸久矣即以狼兵往擊猶拉朽耳興從之既而兵大集進至大洲擊賊殺溺死者萬餘人餘多就撫蕭養中流矢死函首以獻俘其父及子等餘黨皆伏誅論功進右都督留鎮廣東給事中黃士儁劾興寬縱降其官明年復職久之召還分督京營與曹吉祥結姻冒奪門功封海寧伯未幾充總兵官鎮遼東予世券議革奪門者爵興以守邊得免

吉祥誅乃奪興爵仍右都督發廣西立功以錦衣李貴  
薦復爵總兵宣府再予世券憲宗嗣位罷還已停世襲  
家居十餘年卒

何洪全椒人嗣世職為成都前衛指揮使正統中從征  
麓川景泰末從征天柱銅鼓皆有功屢遷都指揮使掌  
四川都司事與平東苗憲宗即位論功擢都督僉事巡  
撫汪浩乞留洪四川許之德陽人趙鐸反自稱趙王漢  
州諸賊皆歸之連番衆數陷城殺將吏遣其黨何文讓

及僧悟昇掠安岳諸縣洪斬悟昇生禽文讓鐸將逼成  
都官軍分三路討洪偕都指揮寧用趙彰明賊引去追  
至梓潼朱家河力戰賊少却洪乘勝陷陣後軍不繼為  
賊所圍左右跳盪殺賊甚衆力竭而死洪勇敢善撫士  
號令嚴蜀將無及之者既死官軍奪氣而四川都指揮  
僉事臨淮劉雄亦戰死雄剛勁遇敵輒前嘗捕賊漢州  
生禽七十餘人及鐸亂追之羅江大水河手馘數人賊  
連敗千戶周鼎傷雄前救之徑奔賊陣叢刺死詔贈洪



都督同知予祭葬子襲廕都指揮僉事雄贈都指揮同  
知賜祭命子襲職超二官洪雖死綿竹典史蕭讓帥鄉  
兵擊鐸破之官兵頻進擊其黨稍散去鐸勢孤帥餘賊  
趙彰明千戶田義等設伏梓潼而叅將周貴直搗其巢  
賊大敗夜奔石子嶺儀亟進斬鐸賊盡平成化元年正  
月也

劉玉字仲璽磁州人生有膂力給事曹吉祥家從征麓  
川授副千戶積功至都指揮僉事天順元年以奪門功

進都督僉事尋充右叅將守備潯州慶遠蠻剽博白及  
廣東之寧川玉偕左叅將范信邀擊敗俄命分守貴  
州從方瑛討貴東苗殲千把豬討西堡苗繫其魁楚得先  
後斬首千級毀其巢而還旋改右副總兵鎮守貴州吉  
祥誅玉下吏當斬以道遠不與謀免死謫海南副千戶  
六年帝將以谷登為甘肅副總兵李賢言登不任玉老  
成乃復以為都督僉事右副總兵鎮守涼州矩咱族叛  
會兵平之進都督同知成化四年滿俊亂固原白圭舉

玉為總兵官統左右叅將夏正劉清討之兵分為七玉  
與總督項忠抵石城賊已數敗會毛中死玉亦被圍中  
流矢力戰得出相持兩月大小百十戰竟平之進左都  
督掌右府事自愬前西堡功命增俸百石掌耀武營六  
年充左副總兵從朱永出延綏五月河套部入犯玉帥  
衆禦却之逾年卒贈固原伯縊毅敏玉雖起僕隸勇決  
過人善撫士所至未嘗衄滿俊之叛據石城險屢敗官  
軍玉戰最力及論功祇賜秩一級時惜其薄子文襲指

揮使

仇鉞字廷威鎮原人初以傭卒給事寧夏總兵府大見  
信愛會都指揮僉事仇理卒無嗣遂令鉞襲其世職為  
寧夏前衛指揮同知理江都人故鉞自稱江都仇氏再  
以破賊功進都指揮僉事正德二年用總制楊一清薦  
擢寧夏遊擊將軍五年安化王寘鐸及都指揮何錦周  
昂指揮丁廣反鉞時駐城外玉泉營聞變欲遁去顧念  
妻子在城中恐為所屠滅遂引兵入城解甲覲寘鐸歸

卧家稱病以所將兵分隸賊營錦等信之時時就問計  
鉞亦謬輸心腹而陰結壯士遣人潛出城令還報官軍  
旦夕至鉞因紿錦廣宜急出兵守渡口遏東岸兵勿使  
渡河錦廣果傾營出而昂獨守城寘鐻以禍牙召鉞鉞  
稱病亟昂來視鉞方堅卧呻吟伏卒猝起捶殺昂鉞乃  
被甲橫刀提其首躍馬大呼壯士皆集徑馳詣寘鐻第  
縛之傳寘鐻令召錦廣還而密諭其部曲以禽寘鐻狀  
衆遂大潰錦廣單騎走賀蘭山為邏卒所獲舉事凡十

八日而敗先是中朝聞變議以神英為總兵官而命鉞為副俄傳鉞降賊欲追敕還大學士楊廷和曰鉞必不從賊令知朝廷擢用志當益堅不然棄良將資敵人耳乃不追事果定而劉瑾睚陝西總兵官曹雄盡以鉞功歸之鉞竟無殊擢巡按御史閻睿訟其功詔奪俸三月瑾誅始進署都督僉事充寧夏總兵官尋論功封咸寧伯祿千石予世券明年冬召還掌三千營七年二月拜平賊將軍偕都御史彭澤討河南盜劉惠趙燧以中官

陸閭監其軍未至而叅將馮禎戰死洛南賊勢益熾已聞官軍將至遂奔汝州又聞官軍扼要害乃走寶豐復由舞陽遂平轉掠汝州東南敗奔固始抵潁州屯朱臯鎮永順宣慰彭明輔等擊之賊倉猝渡河溺死者三千人餘衆走光山鉞追及之命諸將神周姚信時源金輔左右夾擊賊大敗斬首千四百有奇湖廣軍亦破其別部賈勉兒于羅田賊沿途潰散自六安陷舒城復還光山至商城官軍追之急賊復南攻六安將臨時源等涉

河進敗之七里岡賊趨廬州至定遠西又敗還至六安  
分其衆為二劉惠與趙鏐二弟鐠鐠帥萬餘人北走商  
城而鏐道遇其徒張通及楊虎遺黨數千人勢復振掠  
鳳陽陷泗宿睢寧定遠于是澤與鏐計使神周追鏐時  
源金輔追惠姚信追勉兒勉兒鏐復合周信連敗之宿  
州追奔至應山其衆畧盡鏐雖髮懷度牒潛至江夏飯  
村店軍士趙成執送京師伏誅源輔追劉惠連戰皆捷  
惠窘走南召指揮王謹追及于土地嶺射中惠左目自



縊死免兒數為都指揮朱忠夏廣所敗獲之項城丁村  
餘黨邢本道劉資及楊寡婦等先後皆被禽凡出師四  
月而河南賊悉平趙鏐一名風子文安諸生也劉七等  
亂起鏐挈家匿渚中賊驅之登陸將圯其妻女鏐素驍  
健有膂力手格殺二賊賊聚執之遂入其黨為之魁賊  
專事淫掠鏐稍有智計定為部伍勸其黨無妄殺移檄  
府縣約官吏師儒毋走避迎者安堵由是橫行中原勢  
出劉六等上嘗攻鉤州五日以馬文升方家居舍之去

有司遣人齎招撫榜至鉞具疏附奏言今羣奸在朝舞弄神器濁亂海內誅戮諫臣屏棄元老舉動若此未有不亡國者乞陛下睿謀獨斷梟羣奸之首以謝天下即梟臣之首以謝羣奸其桀黠如此鉞既平河南賊移師會陸完共滅劉七等于江北論功進世侯增祿百石仍督三千營八年大同有警命充總兵官統京軍禦之鉞上五事中請遣還京操邊軍停京軍出征以省公私之擾尤切時弊時不能用鉞既至值寇犯萬全沙河擊之

斬首三級而軍士亡者二十餘人寇亦引去奏捷蒙賚  
朝論恥之帝詔諸邊將入侍豹房鉞嘗一入後輒力辭  
十年冬稱疾解營務詔給軍三十人役其家世宗立再  
起督三千營掌前府事未上卒年五十七謚武襄子昌  
以病廢孫鸞嗣侯世宗時怙寵通邊磔死爵除

神英字景賢壽州人天順初襲父職為延安衛指揮使  
守備寧塞營屢將騎兵從都督張欽等征討有功成化  
元年尚書王復行邊薦英有謀勇進都指揮僉事以從

征滿四功遷都指揮使充延綏右參將屢敗伽嘉色凌  
兵進署都督僉事巡撫余子俊築邊牆命英董役工成  
受賚久之充總兵官鎮守寧夏移延綏復移宣府弘治  
改元移大同十一年馬市開英違禁貿易寇掠蔚州又  
不救言官連劾召還閒住尋起督果勇營嘗充右叅將  
從朱暉禦寇延綏武宗立寇犯宣府舉李俊並充左參  
將帥京軍以援尋以都督同知僉書左府劉近畿劇賊  
進右都督正德五年給事中段彥舉劾英老命致仕當是

時劉瑾竊政總兵官曹雄等以附瑾得重權英素習瑾厚賄之因自陳邊功乞敘錄特詔予伯爵吏兵二部持之下廷議而廷臣希瑾指無不言當封者遂封涇陽伯祿八百石未幾寘鐫反命充總兵官討之未至賊已滅其秋瑾敗為言官所劾詔奪爵以右都督致仕越二年卒子周翰粟為指揮僉事累官都指揮使充延綏右叅將正德六年命以所部兵討河南流賊數有功再進都督同知賊平遂以副總兵鎮山西九年秋寇大入寧武

關躍忻定襄寧化周擁兵不戰軍民死者數千詔巡撫  
官執歸京師周潛結貴近行至易州偽稱病自陳戰功  
帝乃宥周罪盡削其秩為總旗而輸粟指揮如故己寅  
緣江彬入豹房驟復都督賜國姓典兵禁中遂與彬相  
倚為聲勢納賄不貲彬敗周亦下獄伏誅

曹雄西安左衛人弘治末厯官都指揮僉事為延綏副  
總兵武宗即位用總督楊一清薦擢署都督僉事充總  
兵官鎮固原以瑾同鄉自附于瑾瑾欲廣樹黨日相親

重正德四年雄上言故事布按二司及兵備道臣文移達總兵官者率由都司轉達今邊務亟徵調不時都司遠在會城往返千里恐誤軍机乞如巡撫大同例徑呈總兵官便兵部尚書曹元希瑾意覆如其言既復受瑾屬奏雄鎮守未佩印宜如各邊例特賜印以重其權乃進雄署都督同知以延綏總兵官吳江所佩征西將軍印佩之而別置靖虜將軍印予江及總督才寬禦寇沙窩為所殺雄擁兵不救佯引罪乞解兵柄令子謐齎奏

詣京師瑾異謚貌妻以從女而優詔褒雄令居職如故  
糾者反被責寘鐫反寧夏雄聞變即統兵壓境上令都  
指揮黃正以兵三千入靈州固士卒心約鄰境刻期討  
密焚大小二壩積草與守備史鏞等奪河西船盡泊東  
岸賊黨何錦懼急帥兵出守大壩以防決河雄乃令鏞  
潛通書仇鉞俾從中舉事賊遂成禽是役也功雖成于  
鉞而居外布置賊不內顧雄有勞焉捷聞瑾以平賊功  
歸之進左都督謚亦官千戶雄不安引咎自劾推功諸



將降旨慰勞未幾瑾敗言官交劾降指揮僉事尋徵下獄以黨逆論死籍其家詔宥之與家屬永戍海南遇赦不原雄長子謙讀書能文有機畧好施予故參政李崙主事孔琦家貧甚雄請周卹其妻子以勸廉吏謙意也御史高蔭先被逮無行貲謙為治裝並卹其家受業楊一清聞一清將起用貽書止之曰近日關中人材連茹而起實山川不幸獨不留三五輩為後日地耶時陝人率附瑾以進故謙云然雄下獄謙亦被繫為怨家篋死

馮禎綏德衛人起家卒伍累功為本衛指揮僉事弘治末擢署都指揮僉事守備偏頭關尋充叅將分守寧夏西路以勇敢聞真鑄反馳奏告變事平進署都指揮同知己擢副總兵協守延綏正德六年七月盜起中原詔以所部千五百人入討至阜城遇賊禎令軍中毋顧首級貪虜獲遂大敗賊逐北數十里俘斬八百六十有奇進解曹州圍執其魁朱諒錄功進都督僉事明年春劉惠趙鏐亂河南連陷鹿邑上蔡西平遂平舞陽葉縱掠

南頓新蔡商水裏城復還駐西平禎偕副總兵時源參將神周金輔擊敗之賊奔入城官軍塞其門乘夜焚死千餘人斬首稱是餘賊潰而西巡撫鄧璋等朝崇王于汝寧宴飲連日賊招散亡勢復振陷鄢陵滎陽汜水鞏圍河南府三日諸軍始集賊屯洛南覘官軍飢疲迎戰右哨金輔不敢渡洛禎及源周方陣而後哨叅將姚信所部京軍先馳失利遽遁陣亂賊乘之禎下馬殊死鬪援絕死馬贈洛南伯賜祭葬授其子大金都督僉事後

賊平論功復廕一子世百戶明年是日禔死所風霾大作又明年亦如之伊王奏聞敕有司建祠歲以死日致祭尋用給事中李鐸言歲給米二石帛二疋贍其家

張俊宣府前衛人嗣世職為本衛指揮使累擢大同遊擊將軍弘治十二年以功進都指揮同知和碩入大同左衛大掠八日俊遣兵三百邀其前復分兵三百為策應而親禦之荆東莊依河結營擊却三萬餘騎帝大喜立擢都督僉事未幾總兵官王璽失事被徵即命俊代

之其冬以寇入戴罪尋移鎮宣府中官苗達督師延綏檄大同宣府卒為探騎俊持不追達遂劾俊帝宥俊而命發卒如達言武宗初立寇乘喪大入連營二十餘里俊遣諸將李禧白玉張宏王鎮穆榮各帥三千人分扼要害俄寇由新開口毀垣入禧遽前迎敵玉雄鎮榮各帥所部拒于虞臺嶺俊急帥三千人赴援道傷足重以兵屬都指揮曹泰泰至鹿角山被圍俊力疾益調兵五千入持三日糧馳解泰圍復援出鎮又分兵救禧玉禧玉

亦潰圍出獨雄榮阻山澗援絕死諸軍已大困收兵還  
寇追之行且戰僅得入萬全右衛城士馬死亡無算俊  
及中官劉清巡撫李進皆徵還御史郭東山言俊扶病  
馳援勸懲不宜偏廢乃許贖罪正德五年起署都督同  
知典神威營操練明年六月賊楊虎等自山西十八盤  
還破武安掠威曲周武城清河故城景州轉入文安與  
劉六等合都指揮桑玉屢敗僉事許承芳請濟師乃命  
俊充副總兵與叅將王琮統京軍千人討之往來近畿

數月不能創賊已朝議調邊軍協守賊遂連敗明年三月劉六劉七齊彥名龐文宣等敗奔登萊海套陸完檄俊軍萊州合諸將李鉉等邀之賊遂北走轉掠寶坻香河玉田俊急偕許泰卻永遏之帝喜勞以白金賊由武清西去未幾得疾召還後賊平實授都督同知久之卒俊為邊將持廉有謀勇其歿也家無餘資李鉉大同右衛人世指揮同知累功進都指揮僉事充叅將協守大同山東盜起詔改遊擊將軍尋充副總兵與俊等邀賊

復與劉暉部將傅鎰張椿等數立功賊平進都指揮同知充總兵官鎮鳳陽諸府尋以江西盜猖檄擢署都督僉事與都御史俞諫同提督軍務賊王浩八據裴源山憑高發矢石官軍幾不支鎰下馬持刀督將士殊死戰賊乃走追數十里擒之復以次討平劉昌三胡浩三等移駐餘干將擊遺賊之未下者疽發背卒于軍詔贈右都督廕子都指揮僉事

楊銳字進之蕭縣人嗣世職為南京羽林前衛指揮使



正德初以才擢掌龍江右衛事督造漕船于淮安寧王宸濠有異謀王瓊以安慶居要害宜置戍乃進銳署都指揮僉事守備其地銳與知府張文錦治戰艦日督士肄水戰十四年六月丙子宸濠反東下焚鼓澤湖口望江已丑奄至安慶城下舟五十餘艘銳文錦與指揮崔文同知林有祿通判何景暘懷寧知縣王誥等禦之江潁已收兵入城被圍銳文軍城西文錦有祿軍城北景暘誥軍東南城西尤要衝銳晝夜拒戰殺傷賊二百餘

斬其間謀乃稍卻七月丁酉賊悉兵至號十萬舳艫相  
銜六十餘里宸濠乘黃艦泊黃石磯身自督戰江西僉  
事潘鵬在賊軍安慶人也宸濠令諭降呼銳及文錦語  
衆心頗搖吏黃洲者以大義責數之鵬慚而退既復持  
偽檄至其家僮見遙呼之銳奮斬以徇將射鵬鵬遁去  
衆心乃定賊怒圍城數周攻益急銳等殊死戰賊雲樓  
數十瞰城中城中亦造飛樓射賊夜縋人焚賊樓賊置  
天梯廣二丈高于城坂蔽之前後有門伏兵其中輪轉

以薄城城上束葦沃膏燃其端梯稍近即投之須臾盡  
焚賊多死時軍衛卒不滿百棄城皆民兵老弱婦女饋  
餉人運石一二數日積如山賊攻城城上或投石或沸  
湯沃之賊輒傷銳等射書賊營諭令解散有亡去者乃  
募死士夜却賊營賊大驚擾比曉稍定宸濠慙憤謂其  
下曰安慶且不克安望南都會聞伍文定等破南昌遂  
解圍去文出城追擊又破之旬有八日而圍解事聞武  
宗大喜擢銳叅將分守安徽池太寧國及九江饒黃銳

薦鄭岳胡世寧帝即召用世宗立論功擢都督僉事廕  
子世千戶再遷僉書左府改南京右府充總兵官鎮遼  
東改督漕運鎮淮安嘉靖十年為巡按御史李循義劾  
罷踰年卒崔文世為安慶衛指揮使守城勞亞于銳世  
宗錄其功超三階為都指揮使廕子世百戶江淮多盜  
廷議設總兵官督上下江防擢文都督僉事任之改蒞  
南京前府專督操江久之卒

贊曰衛青等當承平時不逞竊發列城擾攘賴其戡定

雖所敵非堅然勇敢力戰功多可紀或遂身膏原野若  
何洪劉雄馮禎輩壯節有足惜者鉞以心計定亂銳以  
城守摧逆干城之寄克稱廟謨神英曹雄亦有勞績而  
以附閹損名且獲罪為將者其以跼弛為戒哉

明史卷一百七十五

欽定四庫全書

明史卷一百七十五考證

仇鉞傳直寇犯萬全沙河擊之

臣黃壽齡按沙河原

本訛河沙今據地理改正謹識

楊銳傳己丑奄至安慶城下舟五十餘艘銳文錦與指

揮崔文同知林有祿通判何景暘懷寧知縣王誥等

禦之

臣黃壽齡按舟五十餘艘考識大錄作二百

餘艘並載設鉤距於江側艘抵岸為鉤距所破謹附

識

明史卷一百七十五考證